

Trio's alle jaore

2012

Prins Frans 3 (Klein) en zien adjudante
Herman (Noppert) en Paul (Klein)



Trio 2012:

Prins Frans III Klein

Adjutant Herman Noppert

Adjutant Paul Klein

Vors: Boy Kolman

Veurzitter: Dick Lamboo

Liéfspreuk:

**Weej zien as Wienerminse de keuning te riék,
lachend en dansend op ózze eige
Vastelaovesmeziék.**

**Regerend euver 't moeëjste stökske van de
stad,**

eine moeëjere druim hebbe weej noeëts gehad.

**In de Vastelaovestiéd gaon weej neet slaope
en neet nao bed.**

Jao, de Wien meug d'r zien..zoeë is 't maar net!

Waat vluug d'n tiéd... en zéker daen tiéd wie ik gevraog bin gewaore um as 45e Prins van de Wien veurop te meuge gaon. Leef minse, waat is dezen tiéd gevlaoge! En waat hebbe weej as Prinselik Trio genaote vanaaf de kinnismakingsaovend wies 't vlagstriéke.

't Waas augustus 2011, toen ik beej Paul (miene zoon, later ouk miene Adjutant) nao 't voetballe aan 't kiéke waas, wie de veurzitter mich belde en mich vroog um met de Vastelaovend as Prins veurop te wille gaon. Later bleek det ik de letste Hoégheid waas van Dick as veurzitter van De Wien.

Wae mien Adje's zoele waere, wis ik eigenlijk nog neet persiés, maar det ik Herman zoel vraoge dèt stond vas. En maar good ouk, want Herman is waal 'ne man van de details, want we stónde d'r gelijk op! Maar det haet waal waat meujte gekos um de prinsekemissie te euvertuuge, det weej in Venlo oèt zoele kómme en néét in Volendam! En ouk det waas éch de verdeenste van Herman.

Wie Herman zien "jao"-woord had gegaeve, wis ik zeker, det ik ouk Paul d'r beej woel hebbe, want ouk ein feesverke huurt d'r beej...! 't Prinse-logo had ik al min of mier in miene bums zitte. 't Oétwerke heejvan waas veur Paul - met ziene grafische achtergrónd- dan ouk ein leuke oétdaging.

Waat hebbe weej genaote van dae stillen tiéd achter de scherme... met 't opbouwe van 't golfkerke waat ik moch



lieëne en... beej 't oetkómme veur 't Bestuur, de Raod en ós Iéreleeje op det geheime adres in de Boekenderhof. En dan 's aoves in de Maagdenberg met die golfker nao binne knalle op det PrinseGala!

En waat ein geveul asse as nieje Prins d'r baovenop meugs staon en ouk nog midde tösse ál die Wienböl en Wienbölkes! Zalig waas det! Aansloètend volgde 'ne prachtige Salsa-fièsaovend met 'n heerlijk buffet.

Daags daonao stónde weej te genete op 't Vlaghijse met 'n glaas sjampagne. En met 't zunke baove ós mutse stónde weej as Trio dao waal effe te prónke, huur! Daonao volgde ein zier gezellige Privé-resepsie. Waat mich waal gepaerdskeuteld haet det op 't ind van dees resepsie twië Ald-Prinse van de Wien same stónde te swinge en waal ózze Prins van 't ierste Wien-oor Jan Christis met ald Prins Jac Tunnesen. Det goof mich ein éch kiepevelgeveul.

En in dae dao opvolgende tiéd o.a. alle kemissies van de Wien opzeuke. Ouk det goof 'n erg dankbaar geveul, want dan huurse ouk ens nog ens duudelik waat dees minse al neet allemaol organisere en regele veur de ganse Vastelaovend van en veur de Wien. Ik heb dök gedach: "Minse, geej ziet gold waerd veur ós vereininging!"

Jao, en dan bisse as vereininging en netuurlik ouk as Trio dök aan 't lot euvergeleverd en dan bedoel ik o.a. heejmei, det weej as letste Trio in ós kerkske van St. Joep ós Vastelaovesmis hebbe meuge viere. Heb boète waal 'ne kier mótte slikke wie ózzen bisschop Wiertz de sleutel van ós kerkske op zóndaag 1 juli 2012 veur de letste kier umdreide... Heej is toch waal ein stökske tradisie met weggevalle. Zoeë ouk met de gekleurde vaere op de prinsemuts, wao miene Hoégheid Leon II in 2005 mei is begós en det ik dees tradisie noow moch aafsloète.

Waat weej zeker mótte bliéve koestere, zien netuurlik ós eige Wienleedjes. Want wao-se as Wienvereininging ouk binnekumps, huurse toch geliék de toeëne van **"As ik dich zeen"** en netuurlik ózze eige **Wienbol-lek-lek-lek...!**

Al met al, leef minse, waat hebbe weej ein prachtige vereininging... ein vereininging met oëtstraoling! As weej nao de resepsies ginge en weej kwame as Trio van de buun aaf dan stond d'r ónder aan de trap waal ein Wienbestuur en eine Wienraad van Elf, die zich zeker meuge laote zien!

Ós res nog 't Aaftraeje met joeks, maar ik bin d'r vas van euvertuug, det ouk dét ein geweldige heppening geit waere!

Leef Wienminse, geej allemaol bedank veur deze ónvergaetelikken tiéd. Merci!

Met Wiengroete van ógge Prins Frans III

